

ILUARSIISSUT

Allabguutissat siunnersuut ulloq 16. februar 2021-meersoq taarserpaa
(Inatsisartuni gruppini siulittaasut amerlanerussuteqarluarnikkut § 02 malillugu
aalajangiisinnaanerat)

Allannguutissat siunnersuut

Uunga

Uunga siunnersuut: Inatsisartunut immikkut ittumik qinersineq pillugu Inatsisartut inatsisaat nr. xx. xx.xx 2021-meersoq

Aappassaaneerinninnermi Naalakkersuisunit saqqummiunneqartoq

Paragraffit nutaat

1. § 3 kingorna ikkunneqassapput:

”Coronap atuunnera pillugu suliniutissat

§ 01. Inatsisartut aamma Naalakkersuisut pillugit Inatsisartut inatsisaanni § 29-imi
killissaliussat iluanni, partiini siulittaasut, Inatsisartuni ilaasortaataat minnerpaamik 2/3-iinik
tunuliaqutaqartut akuersinerisigut Naalakkersuisut piginnaatinneqarput:

- 1) Nappaatit tunillaassortut akiorniarlugit iliuitsit pillugit Inatsisartut peqqussutaat malillugu
nalunaarutinik aalajangersaanissamut.
- 2) Aningaasaqarnermut Akileraartarnermullu Ataatsimiititaliap akuersissuteqarneratigut
2021-mut aningaasanut inatsimmi kontumi pingaarnermi 20.10.34-imi aningaasaliissutit
immikkoortinneqartut aammalu aningaasaliissutinut atasut piginnaatitsissutit iluanni
inuussutissarsiorturnut namminersortunut sammitinneqartunik ikiorsiissutissanik
aallartitsinissamut imaluunniit sivitsuinissamut. Ikiorsiissutissat qinersereernerup kingorna
Naalakkersuisut nutaat toqqarneqareernerisa kingorna kingusinnerpaamik qaammatip ataatsip
qaangiunnerani atorunnaassapput.

*Suliniutissat sanaartugassat pillugit neqeroortitsinerup isumaqatigiissutillu
isumaqatigiissutigineqarnissaannut tunngasut*

§ 02. Sanaartugassat sanaartornissamut pilersaarusernerat naammassereersut aammalu
2021-mut aningaasanut inatsimmi aningaasaliissutit pisariaqartut
immikkoortitsivigineqareersimasut pillugit neqeroortitsinerup ingerlannissaanut
isumaqatigiissuteqarfiginissaanullu, taamaaliunnginneq inuiaqatigiinnut ajoqusiisumik

sunniuteqartussaappat, ilanngullugu nunap karsianut imaluunniit suleqatigisanut namminersortunut aningaasaqarnikkut annaasaqarnermik malitseqassappat, suliffissaaleqisunik amerlisitseqataassappat imaluunniit sanaartugassanik kinguaattoortitsissappat, Inatsisartut aamma Naalakkersuisut pillugit Inatsisartut inatsisaanni § 29-imut killissaliussat iluanni partiini gruppini siulittaasut, Inatsisartuni ilaasortaaitat minnerpaamik 2/3-iinik tunuliaqutaqartut akuersinerisigut Naalakkersuisut piginnaatinneqarput.”

Nassuiaatit nalinginnaasut

1. Coronavirusip akiorniarneqarneranut suliniutissat

Coronavirus nunarsuarmi peqqissutsimut ajornartorsiortitsivoq. Coronavirus pillugu aammalu peqqinnissaqarfiup inuiaqatigiillu tamakkiisuutillugit sunnerneqarnissaat pillugu paasissutissanik nalilersuinernillu nutaanik takkuttoqartarnera ilutigalugu suliniutissat sukkasuumik naleqqussarneqartarnissaat, coronavirusip sunniuteqarluartumik akiorniarnissaanut pisariaqartoq paasinarsisimavoq.

Qinersinissamik suaruteqareernermi Naalakkersuisut, Inatsisartut Naalakkersuisullu pillugit Inatsisartut inatsisaanni § 29 naapertorlugu atorfinni suliassat akornuserneqanngitsumik ingerlaannarnissaannut atasut kisiisa ingerlattussaavaat. Naalakkersuisuugallartut aalajangiisinnaatitaanerisa atuuffissaat, ingerlatsinerit ingerlatiinnarnissaannut pisariaqartunuinnaq, qinersinerup nalaani annikillisinneqarpoq. Pisuni arlalinni coronavirusip akiorniarnissaanut suliniutissat pillugit aalajangiinerit atorfinni suliassat akornuserneqanngitsumik ingerlaannarnissaattut taaneqarsinnaasuniissapput.

Suliniut atorfinni suliassat akornuserneqanngitsumik ingerlaannarnissaannut ilaasutut nalilerneqaraluartoq, tamanna qineqqusaarnerup nalaani Inatsisartut annertunerusumik akuutinneqarnissaat naleqqussinnaavoq, taamaalilluni suliniutissanik akuersinermi il.il., suliniutit qineqqusaarnermik akornusersuinnginnissaat imaluunniit partiit aalajangersimasut partiinut allanut sanilliullugit iluaqutissarsitinneqannginnissaat (imaluunniit taamaassorinninnissaq) immikkut eqqarsaatigineqarsinnaassalluni.

Siunnersuutip atuutilernerani partiini siulittaasut, Inatsisartuni ilaasortanik amerlanerussuteqarluartunik tunuliaqutaqartut sioqqutsisumik akuersissuteqartinnissaanik Naalakkersuisut pisussaaffilerneqarput. Amerlanerussuteqarluartuni pineqarpoq Naalakkersuisut siunnersuutaat partiini siulittaasunit Inatsisartuni ilaasortat minnerpaamik 2/3-iinik tunuliaqutaqartunit taparserneqarsimassasut. Qinersinissap tungaanut taamaalillutik amerlanerussuteqartut maannakkut Inatsisartuni ilaasortat minnerpaamik 2/3-iinik

tunuliaqutaqassapput. Inatsisartunut nutaamik qinersisoqalernerani Inatsisartunut ilaasortaaitat atorunnaartarput, tassani ilaasortaaitat nutaat qinerneqartarlutik. Taamaattumik qinersereernerup kingorna amerlanerussuteqartut Inatsisartuni nutaamik qinerneqartuni Inatsisartunut ilaasortat minnerpaamik 2/3-iinik tunuliaqutaqassapput. Qinersereernerup kingorna partiinut siulittaasoq paasineqassaaq tassaasoq inuk partiini ilaasortaaitat nutaat aallartitassaattut partiit ataasiakkat toqqagaat. Pineqartoq Inatsisartunut qinigaasimassaaq. Tamatumunnga siunertaavoq suliniutinut taamaattunut atituumik inatsisartuni tapersiisoqarnissaa. Peqatigisaanik coronamut iliuusissanik aallartitsinissanut pisariaqarluinnartunut ikinnerussuteqartut akornusersuinissamut periarfissinneqannginnissaat qulakkeerneqassaaq.

2. Sanaartornermut suliassaqarfimmi atugassiinerit

Siunnersuutigineqarpoq sanaartugassat suut qinersinerup nalaani ingerlaannarsinnaanissaannut tunngaviusussat erseqqissarneqassasut. Aalajangersagaq Inatsisartut Naalakkersuisullu pillugit Inatsisartut inatsisaanni § 29 naapertorlugu Naalakkersuisuugallartut aalajangiisinnaatitaanerit ataqqillugu nassuiarneqassaaq. Tamatuma saniatigut partiini siulitaasut, Inatsisartuni ilaasortaaitat minnerpaamik 2/3-iinik tunuliaqutaqartunit akuersinissaat piumasaqaataavoq.

Atorfinni suliassat akornuserneqanngitsumik ingerlaannarnissaattut paasineqassaaq aserfallatsaaliuinerimi, iluarsaassinerimi isaterinermilu suliassat, ingerlaavartumik, sumiiffinni suliffissaqartitsiniarnermut iluaqutaasussat, kiisalu aserfallatsaaliuinerit pilersaarutigineqartut, illuutit sanaartukkallu inuiaqatigiinni annaasaqarnernik malitseqartumik aserfallannerulinninnissaannut ingerlanneqartussat.

Siunnersuut sanaartornermut suliassaqarfimmi annertunerusumik erseqqissaanertut isikkoqarpoq.

Taamaattumik siunnersuutigineqarpoq, suliassaq kinguartinneqassappat inuiaqatigiinnut ajoqusiisumik sunniuteqartussaasuni, suliassanut neqeroortitsivigineqarsinnaasunut aammalu isumaqatigiissuteqarfigineqarsinnaasunut ataatsimut isigalugu tunngaviusussat aalajangersarneqassasut.

Pisuni tamaginni tunngavissaatinneqarpoq isumaqatigiissuteqartoqassasoq il.il., neqeroortitit kissaatigineqartut iluanniitinneqassasut, neqeroortitsineq inatsimmi piumasaqaatinik naammassinnissasoq, aammalu suliassaq aningaasanut inatsimmi killissaliussat il.il. atuuttut iluanniitinneqassasoq.

Siunnersuummi aalajangersakkanut ataasiakkaanut nassuiaatit*§ 01-imut*

Imm. 1-imut

Siunnersuutip atuutilernerani suliniutissat aalajangersakkami allattorsimasut - Inatsisartut Naalakkersuisullu pillugit Inatsisartut inatsisaanni § 29 naapertorlugu atorfinni suliassat akornuserneqanngitsumik ingerlaannarnissaannut allatigut ilaasut - imm. 1-imi aalajangersakkami maleruagassat malillugit akuersissuteqarfigineqartassapput.

Siunnersuummi partiit siulittaasuinit Inatsisartuni ilaasortaatitat minnerpaamik 2/3-iinik tunuliaqutaqartunit akuersissuteqarfigineqartumik nr. 1-2-imiittut piginnaatitsissutit atuutsinnissaannut Naalakkersuisut piginnaatinneqarput.

Suliniutissat aalajangersagaq malillugu ingerlanneqartussat coronavirusimik tunngavilersugaassapput imaluunniit tassaassallutik suliniutissat coronavirusip toqqaannartumik malitsigisaanik inuiaqatigiinni ajoqusiisumik sunniinermik pakkersimaarinninnissamik siunertaqartut. Assersuutigalugu aalajangersagaq naapertorlugu inuussutissarsiortunut ikiorsiisutissat assigisaalluunniit annertunerpaatigut inuiaqatigiinni pissutsinik allanik tunngavilersugaasut aallartinneqarsinnaanngillat, soorlu niuerfinni akigitat pissusissamisoorunnaarnerat imaluunniit ajornartoornerit allat. Taamaalilluni assersuutigalugu inuussutissarsiordermi ajornartoornermut pissutaasoq coronap ajornartorsiutaanerani allarnerusunik tunngaveqarpat, aalajangersagaq malillugu aalisarnermik inuussutissarsiuteqartunut tapersiisoqarsinnaanngilaq.

Aalajangiisinnaatitaanerit allat imaluunniit suliassat inatsisini pisussaaffiliiffiusut Naalakkersuisut inatsisit allat naapertorlugit pisussaaffigisaat, aalajangersakkami kalluarneqanngillat.

Nr. 1-imut

Siunnersuutigineqarpoq Naalakkersuisut imm. 1 naapertorlugu akuersissuteqartoqareernerani, nappaatit tunillaassortut akiorniarlugit iliuutsit pillugit Inatsisartut peqqussutaat nr. 20, 12. november 2001-imeersup (kingusinnerusukkut allannguuteqartartoq) iluani qulequttat arlallit pillugit nalunaarutinik nutaanik aalajangersaanissamut piginnaatinneqassasut. Tassani qulequttat ullumikkut maleruagassiivigineqartut pineqarput, ilaatigut:

- Kalaallit Nunaannut aamma Kalaallit Nunaanni angalaneq pillugu nalunaarut.
- Katerisimaartarnermut, ininut kikkunnit tamanit iserfigineqarsinnaasunut assartuutinullu killilersuigallarnerit pillugit nalunaarut.

Nalunaarutini marlunni taaneqartuni taakkunani killilersuinerit, inerteqquteqarnerit peqqusissuteqarnerillu il.il. – tamanna tikitsinnagu taakkua atorunnaarsinneqarsimangippata imaluunniit allanngortinneqarsimangippata – 30. april 2021 tikillugu ilanngullugulu atuutissapput.

Nr. 2-imut

Naalackersuisut imm. 1 malillugu akuersissuteqartoqareernerani aammalu Aningaasaqarnermut Akileraartarnermullu Ataatsimiititaliap akuersissuteqarneratigut inuussutissarsiortunut ikiorsiissutissanik aallartitsinissamut piginnaatinneqarput. Taakkua tassaasinnaapput ikiorsiissutissanik nutaanik saqqummiineq imaluunniit ikiorsiissutissanik atuutereersunik iluarsineq.

Siunnersuutigineqarpoq suliniutissani aallartinneqartussani atorunnaarfissaannut piunasaqaammik ilanngussinissamik pisussaaffimmik inatsimmi aalajangersarneqassasoq. Tamatuma atuutilernerani suliniutissat aalajangersakkanik il.il., Naalackersuisut nutaat Inatsisartunit toqqarneqareernerisa kingorna kingusinnerpaamik qaammatip ataatsip qaangiunnerani atorunnaarnerannik malitseqartussanik, imaqassapput.

Suliniutissat Naalackersuisunngortussanut imaluunniit Inatsisartunngortussanut politikikkut iliuseqarsinnaanerup naapertuutinngitsumik killeqalersitsinninnissaat, tamatumani qulakkeerneqassaaq. Peqatigisaanik suliniutissat ingerlatiinnarneqassanersut imaluunniit atorunnaaginnassanersut isummernissamut Naalackersuisut qaammammik ataatsimik piffissaqassapput.

§ 02-imut

Aalajangersagaq malillugu suliassat kinguartinneqarnerat inuiaqatigiinnut ajoqusiisumik sunniuteqassappat, suliassanut neqeroortitsisoqarsinnaavoq. Tamanna naalackersuisuugallartut piginnaatitaanerannut naapertuuttutut nalilernerqarpoq. Taamaattoq sanaartugassat annertunerusut, tunngaviusumik pingaaruteqartut imaluunniit politikikkut assortuussutaasut qinersinerup nalaani ingerlanneqarsinnaassanngillat.

Suliassanut aalajangersimasunut aalajangersakkami ilaatinneqarsinnaasunut, aammalu piffissami qinersiviusumi neqeroortitsivigineqartussatut naatsorsuutigineqartunut tunngatillugu pingaartumik suliassat pingasut taaneqarsinnaapput:

Inuusuttunut inissiat 2021, Qaanaaq:

Suliassami ilaatinneqarput 6-inik Qaanaami Inuusuttunut inissialiorneq. Inissiat Inuusuttunut inissianut suliniut naapertorlugu sananeqarput – illu aalajangersimasumik suussusilik, suliniut assigiissaariviusoq ineriartortinneqartoq.

Suliniut 2021-p qiteqqunneraniit 2022-imi ukiarnissaata tungaanut suliarinninnermi najukkami suliffissaqartitsinnermut iluaqutaassaaq, aammalu taamatuttaaq coronavirusip malitsigisaanik suliffissaaleqisunik ikilisitseqataassalluni.

Martsimi maannakkut neqeroortitsinnginnerup kingunerisaanik suliassaq aatsaat aappaagu neqeroortitsivigineqarsinnaassaaq. Tamanna pingaartumik illoqarfimmut nassiussanik assartuussinnermut tunngatillugu ingerlasussanik piareersaanissaq eqqarsaatigalugu isigineqassaaq, upernaakkut umiarsuup siullermeerluni tikinnerani ilaatinneqarsinnaanissaasa angumerinissaa qulakkeerniarlugu, upernaakkut isumaqatigiissuteqartoqarsinnaangorlugu neqeroortitsineq pisussaalluni.

Aasianni inissiat nutaat:

Suliassami ilaatinneqarput Namminersorlutik Oqartussat Inissianut Piujuartitsiviusussanut assigiissaartunik inissialiassanut suliniutaat aallaavigalugu, Kommune Qeqertalik suleqatigalugu Aasianni inissialiassat 60-it. Suliniut najukkami betonngit ikkussugassat tunisassiarineqartut atorlugit ilusilersorneqarpoq. Namminersorlutik Oqartussat 24-inik inissaliussapput, aammalu kommuni 36-inik inissaliussalluni.

Upernaarmanna neqeroortitsisoqannginnerata aammalu isumaqatigiissuteqartoqannginnerata sunniutissai Inuusuttunut inissialiassanut tunngasut taamaaqatigai, tassa imaappoq, ukiup qanoq ilinerani suliaqarnermut atatillugu tamatuma naleqqussarneqarnerata malitsigisaanik piffissamut pilersaarut annertunerusumik nikittussaavoq, pingaartumik ikkussugassanik tunisassiornissamut tunngatillugu. Aammattaaq Aasianni inuussutissarsiortut upernaq manna neqeroortitsinerup pinissaa piareersimaffigaat, taamaattumik neqeroortitsisoqanngippat isumaqatigiissuteqartoqanngippallu tamanna sanaartornermik suliaqarnerup annikillineranik malitseqartussaalluni, tamatumalu malitsigisaanik suliffissaaleqisoqalernissaa aarlerinaateqarnerulertussaalluni.

Suliassap ingerlanneqarnissaanut atugassiinissaq kontup pingaarnerup 89.72.12-ip iluani missingersuutitut sunniuteqanngitsumik nuussinikkut pisussaassaaq, tassani taamaaqataanik ukiuni missingersuusiorfiusuni tamatumunnga aningaasassanik immikkoortitsinissaq pisariaqartinneqartussaalluni.

Ilinniartunut inissialiassat:

Piffissamut 2020-2026-imut katillugit 511,4 mio. koruunit aningaasaqarnikkut killiliussat iluanni ilinniartunut inissialiornissaq pillugu isumaqatigiissuteqarnissamut Naalakkersuisut piginnaatinneqarnissaat pillugu ulloq 22. december 2020 Aningaasaqarnermut Akileraartarnermullu Ataatsimiititaliap ilassutitut aningaasaliissuteqarnissaq akueraa, takuuk IA-suliaq nr. 20-912. Ilassutitut aningaasaliissuteqarnermi 2020-imut katillugit 242,1 mio. koruunit immikkoortinneqarput suliassap normuisa 5-it suliarineqarnissaanut:

- Suliassaq nr. 100.52.111 siniffissat 64, Aasiaat.
- Suliassaq nr. 120.52.112 siniffissat 70, Ilulissat.
- Suliassaq nr. 080.52.113 siniffissat 72, Sisimiut.
- Suliassaq nr. 060.52.114 siniffissat 218, Nuuk.
- Suliassaq nr. 020.52.115 siniffissat 100, Qaqortoq.

Illassutitut aningaasaliissutissat ulloq 22. december 2020 akuerineqarmata, 2021-imut aningaasanut inatsimmi siunertamut aningaasaliissutinik immikkoortitsineq ilanngunneqarsinnaasimangilaq. Taamaattumik Aningaasaqarnermut Akileraartarnermullu Ataatsimiititaliamit aningaasaliissutinik atugassiinissaq suliassami pisariaqarpoq.

Taamaalilluni ilinniartunut inissialiassat entreprenørimumut isumaqatigissuteqarnermut naapertuuttumik 2021-imi akornuteqanngitsumik ingerlaannarsinnaanissaanut, aningaasassanik atugassiinerup akuersissuteqarfigineqarnissaa pisariaqarpoq.